



Nooh 'm Rehje.

Bedschd geh ich mol im Schdaddparg schbaziere,
Warem aⁿgezoh, iß nix se rischiere;
Im Schdaddpark kammer grad 's erschde Grie
Wie schei aus de Knebbcher schbitze sieh.
De Wind durch die Äschd un Gibbel schdreicht,
De Borrem uffgeledschd un feicht,
Un durch de Sand, gemiedlich un dräg
Do ziehen Rehjewerm ehren Weg.
Uⁿwillkierlich hann ich do Hald gemachd
Un mer mol die Gesellschaft bedrachd;
Wie se uⁿbekimmerd um's wo un wohiⁿ,
Ausfichdehne un zusammezieh;
Un midd jerem Druck un midd jerem Zick
Weider kumme e gures Schdick.
For unferähns vun Ord zu Ord
Kummen se jo viel zu langsam ford,
Doch muschde bedenke, 's iß doch bloos e Worm,
So ähner hadd annere Moos un Norm,

For denne iß so Weg un Krääs
 Sozeſahe e Amerigarääs.
 Un kummd er reduur, beſchdaabd un bedreßt,
 Un mähd dann wunners, waß er entdeßt,
 Iß deß bei denne grad so e Miraggel
 Als wie bei uns, nor fäh" so Schbeggdaggel.
 Dann aah so e Vieh hadd ſei" Vernunft,
 Un hann ſe aah fäh" Gelehrdezunſd,
 For die iß e Weg, nor e Schbanne weid,
 Aah ſoviel Schridd in die Ewigkeid;
 Un wann ſe e Menſchefuuß verdreed,
 Un wann e Wahe iwwer ſe gehd,
 Dann iß deß for die grad so e Schiggſalſſchlag
 Als wie bei uns Durchſchniddsmenſche aach.
 Wie ich dodriwwer nooh ſimulier
 Do kummen ſich gejeſeidig in's Revier
 Zwää Werm, do heſchde waß ſiehe kenne,
 Wie die ſich drehe un die ſich wenne,
 Un ähner 'm annre de Weg ſchdreidig mache
 Ich kunnd mer net helfe, ich muß laut lache;
 Waß lachſchde, derweil de so weider wannerſchd?
 Machens bei uns dann die Menſche annerſchd?

